

國史列傳

滿漢大臣列傳

卷六十九

蔣兆奎

吳省蘭

路超吉

潘韜

王汝璧

尹壯圖

蔣兆奎陝西渭南人由副榜貢生捐教諭乾隆二十六年補甘肅張掖縣教諭三十年中式舉人三十一年成進士以教授銜管教諭事三十三年俸滿保舉授四川合江縣知縣調灌縣知縣以憂去四川總督富勒渾奏請留川省辦理軍務旋署華陽縣知縣

賞知州銜四十一年捕獲拒傷官兵囑匪首犯送部引

見交軍機處記名四十二年四月服闋四十四年補山西澤州府同知四十六年遷安徽潁州府知府改授山西汾州府知府四十八年調太原府知府四十九年擢河東鹽運使五十四年二月遷山西按察使六月擢甘肅布政使五十六年調山西布政使時河東商力疲乏議將鹽課改歸地丁

上以蔣兆奎曾任河東運使鹽務素所熟諳

命協同山西巡撫馮光熊經理旋議將山西陝西河南三省應納之正課雜項共四十八萬餘兩在於三省行鹽完課納稅之一百七十二廳州縣地丁項下通計均攤約計每兩攤銀九分有餘馮光熊奏入下部議行五十七年閏四月奉

上諭河東鹽務從前簽商承辦徒滋地方官勒索之弊是以議將鹽課改歸地丁以期利歸於下商民交便現在該省鹽池產鹽旺盛兩三月內發販鹽數較往年多至加倍是鹽課改歸地丁一事效驗甚速此議實蔣兆奎所倡今果能始終承辦已著成效甚屬可嘉兆奎著加恩賞戴花翎十二月擢山西巡撫五十八年二月奏裁芮城縣陌底渡巡鹽巡檢五月奏山西省北邊牆一道中有殺虎寧魯得勝等口三十六處向於殺虎口設立監督凡貨物往來必由該口投稅放行乾隆二十九年經前撫臣和其衷奏請於左雲縣屬之寧魯口添設稅口稅務仍歸殺虎口監督派人徵收奉旨允行在案茲查近來各貨多在大同府城聚集由府城出寧魯口至豐鎮發賣計程三百六十里出殺虎口遠至五百二十

里道里既遠則腳價增添貨物因而昂貴若由大同府出得勝口至豐鎮廳僅止百里道甚平坦車輛可通請於得勝口添設稅口俾貨物就近投稅赴豐鎮實屬商民兩便

從之八月以辦理秋審人犯內佈蘭毆死濟成一案定擬錯誤命傳旨嚴飭並交部議處五十九年迎

駕淀津

賞穿黃馬褂六十年奏山西寶晉局鼓鑄原設六爐前因錢價平賤減去二爐祇存四爐並查省城現在錢價每庫平紋銀一兩易錢一千文市平紋銀一兩易錢九百八十文不等較之未曾減爐之前仍屬相仿而各州縣錢價亦未見昂將寶晉局減存四爐全行停鑄其搭放兵餉請

旨以銀兩滿支報

可嘉慶元年參奏汾州府知府張力行審辦岳望冀等負欠錢債與伊子張情田通同婪索冀寧道鄧希曾太原府知府高燦朔平府知府章鈺寧武府知府張端城委審此案未能審出實情恐有迴護同官情弊得

旨張力行著革職拿問鄧希曾高燦章鈺張端城均著解任交與蔣兆奎一併提集人証嚴行質審定擬具奏又續參張力行於庫貯兵餉飯食等項銀侵用一千二百餘兩業據供認

諭曰張力行以知府大員於審追錢債事件任意婪贓已屬大千法紀茲又查出張力行侵用兵餉各項銀至一千餘兩實出情理之外現經軍機大臣會同法司定擬斬決但該參員尚有婪索贓銀一案應行質對著傳諭蔣兆奎將前案卽速審訊明確歸案定擬一面具奏一面照議再將張力行卽於該處正法以昭炯戒二年八月以勦辦教匪調派本省官兵妥速交部議敘十一月以病懇休得

旨蔣兆奎准其解任卽就近回籍調理四年二月起爲漕運總督七月倉場總督達慶奏本年山東臨清一帶河水稍落糧船起撥耽延天津以南脫幫計三十二日奉

上諭漕船脫幫例干嚴議今夏運河水淺糧船起撥不免耽延亦何至脫幫三十餘日之多該漕督總司漕務不能設法遄行著交部照向例議處尋議銷職奉

旨改爲降二級留任八月奏辦理漕運要在卹丁現在清釐漕務

嚴諭有漕各省督撫整飭一切慎選米色革除陋規誠百度維新之會也第查陋規內旗丁於水次兌銀時向州縣需索兌費有一二百金者今既徵米精純嚴禁浮收州縣竝無餘利豈肯復出兌費旗丁既得好米需索無詞自當受兌開行惟各衙門以及沿途陋規雖已革禁旗丁花費自可節省而生齒日煩諸物昂貴應得之項委不敷用急須調劑前讀

上諭言有漕州縣無不浮收江浙尤甚每石加至七八斗等語此歷來交納習以爲常今若於七八斗之內劃出一斗津貼旗丁其餘盡行革除所出有限所省已多不特千萬旗丁藉資濟運即交糧億萬花戶已沾

恩於無窮奏入

命大學士會同戶部議奏

諭曰州縣徵收漕米不許顆粒加增例禁甚明近因各省多有浮收之弊節經降旨嚴查整飭今蔣兆奎以旗丁用度不貲輒

請明定章程每石加增一斗以資津貼是使不肖官吏益得有所藉口且名爲加收一斗其所徵並不止於數恐浮收積弊仍不能除而此新增一斗之糧與加賦何異其事斷不可行惟邇年旗丁疲乏亦當設法調劑量爲津貼著有漕各督撫確查妥議具奏務令丁力不致拮据而正供不致加增方爲妥善十一月奏各幫費用不敷現奉

恩旨設法調劑令有漕各督撫確查妥議無如調劑者有名無實惟兩江總督費淳所奏與運費並不敷用尙奉部駁而江蘇撫臣之四升七合安徽撫臣之二升焉能有濟揆度情形必有貽誤臣才識短淺無能補救惟求

皇上另簡賢員速爲接手庶於卹丁濟運之道實有裨益

諭曰蔣兆奎係朕特簡漕督如果實有礙難辦理之處亦應再爲設法籌畫何得竟請罷歸爲此忿激之語看來蔣兆奎竟不免聽信漕屬員弁一面之言而又無良策以善其後遽以引退爲詞實屬冒昧粗率蔣兆奎著傳旨嚴行申飭并著將漕運情形詳悉陳明除加賦一節斷不可行外其應如何津貼之處再

行明白迴奏候旨遵行尋奏漕船冬兌冬開現在漸次兌漕轉
瞬開行一切費用入不敷出燃眉之急已不可解再四思維苦
無良策擬每船借給銀一百兩於各省糧道庫內支領分作三
年在該丁應領項下扣還歸欸其山東河南船隻路途較近每
船只給銀五十兩已可接濟再查有漕各省皆有輕齎一項本
係徵收之米每斗折銀五分名爲輕齎今請仍徵本色按照旗
丁每船所載米數賞給又江安輕齎改徵本色米石較少蘇松
輕齎改徵本色米石較多白糧竝無輕齎請通融勻撥漕白各
幫如此則漕運不致拮据可以一勞永逸

諭曰蔣兆奎奏酌籌津貼運費一摺已交戶部議奏矣前兆奎
有加徵收漕米每石徵收一斗之奏事屬加賦斷不可行今閱
所奏又係損民益丁之事其意總欲於正供內設法增添巧避
加賦之名而仍存加賦之實自係輕信衛弁慫恿爲其所愚故
爾頻頻瀆請但加賦一節斷不可行朕志已定蔣兆奎如果自
問才具不能將漕運妥爲經理卽當據實具奏不能輒忿激求
去如明季掛冠之狀朕前不可施此伎倆也將此諭令知之仍

卽明白迴奏又

諭令鐵保馳驛前往會同費淳詳細訪查兆奎究係聽信何人之言屢次瀆請抑係年老不能經理旋據兆奎覆奏臣才具實不能將漕運妥爲經理不勝漕督之任懇祈

皇上另簡賢員將臣更換此時正喫緊之際併求

皇上令更換之員卽刻來淮接手免致誤公又奏臣前摺曾將旗丁運費不敷及臣求退情由具奏在案而其故尙未縷晰陳明查旗丁運費本有應得之項應無不敷惟所定領項在數十年百餘年以前迨後生齒日繁物價數倍從前所定之領項不敷現在之費用而近年旗丁尙可撐持者以州縣浮收向索兌費竝因州縣折米石將行月等米亦向州縣折收兩項所得以之貼補一切經費竝各費浮費現在革除漕弊則浮費可省而兌費究不能減於是始議劃米一斗再議輕齎改本均以加賦不准臣才識短淺別無經理良策恐貽誤重務懇
皇上另簡賢員接辦原從小心敬畏而來竝未氣質用事先後
奏入

諭曰向來有漕省分徵收漕糧州縣以濟運爲名多方浮收最爲民困是以降旨清釐漕政剔除積弊仍慮運丁兌費不敷令有漕省分各督撫確查妥議酌給津貼並降恩旨令旗丁多帶土宜二十四石免其上稅原期地方漕務兩有裨益而兆奎總以運費不敷爲詞頻頻瀆奏又不妥籌辦法其意總在加賦借帑始終堅執已見執拗不回看來蔣兆奎竟難勝漕督之任所有漕運總督員缺卽著鐵保補授蔣兆奎仍著留該處俟費淳鐵保查辦完竣後再降諭旨五年正月費淳等奏查明蔣兆奎屢以旗丁兌費不敷瀆奏係爲恐誤漕運起見尙無任聽衛弁恣恧情事奉

旨蔣兆奎免其交部議處卽來京候旨是月補工部右侍郎旋授山東巡撫閏四月奏年老有病懇請

簡員更換

諭曰蔣兆奎前在山西巡撫任內因年已七十兼患怔忡予告歸里上年來京朕看其精力未衰復用爲漕運總督伊赴任後將近一年聲名尙好惟於旗丁津貼不敷一節始則妄議加賦

繼則請借給各幫銀兩曉曉置辯經朕節次申飭伊卽懇請解任已失敬事之道姑念其平日官聲清潔不肯卽加罷斥改授工部侍郎伊來京謝恩在朕前猶以旗丁究屬不敷於漕運恐有貽誤堅執前見其實鐵保接辦漕運後竝不見其掣肘各省漕艘俱各依限開行現已陸續抵通並無遲緩可見蔣兆奎於漕運情形全不悉心體究逞其偏見自以爲是其剛愎自用之咎實無可辭朕猶念其曾任封圻於地方事務較爲熟諳將伊補授山東巡撫伊到任後於該省吏治官方並未見實有整頓之處前因御前侍衛明安往泰山進香回京奏稱東省地方官私餽贖儀八百兩竝稱沿途經過營汛墩房坍塌未見有兵丁守驛曾明降諭旨將兆奎等申飭據伊覆奏上年明安前赴泰安進香亦曾收受銀八百兩至守汛兵丁因明安乘馬馳行不及身穿號衣站班伺候等語殊不成話向來奉旨出差人員沿途驛站俱有傳單預行知照豈有明安業已到境而汛兵尙未得信之理所奏實屬迴護強辯復降旨申飭茲蔣兆奎遽因此事忿激求去如此執拗任性豈人臣事君之禮乎況朕不過降

旨申飭尙未將伊交部嚴議而伊卽抗章求退內外大臣有善必旌有過則不應加之譴責乎若臣工等皆似此相率效尤寧不成明季掛冠惡習此風斷不可長蔣兆奎在朕前尙敢如此其接見屬員辦理公務必更有偏執己見不恤人言之處安能飭吏治而得民心本應革職治罪究念其廉名素著量予薄懲蔣兆奎著革退巡撫拔去花翎加恩降爲三品卿銜卽予休致由山東啟程回籍不必進京謝恩伊卽來京朕亦不復召見回籍後惟當閉門思過以終餘年用副朕格外矜全至意五月御史周枋參奏兆奎因事

申飭竟引疾求去嗣蒙

恩賞卿銜理宜匍匐宮門謝恩請罪乃竟悍然不顧逕自歸里請交部治罪

上以蔣兆奎係奉

旨回籍毋庸過事搜求

特原之七年二月卒子蓮二品廕生捐納主事

吳省蘭江蘇南匯人乾隆二十八年由舉人考取咸安宮官學

教習三十二年考補國子監學正三十六年陞助教三十九年充四庫全書館分校官八月鄉試屆期省蘭未成進士例不開列

特命充順天鄉試同考官是年京察一等四十二年京察復列一等引

見均得

旨記名四十三年戊戌會試未中式

諭曰國子監助教吳省蘭學問尙優且在四庫館校刊羣書頗爲得力著加恩准其與本科中式舉人一體殿試尋列二甲改翰林院庶吉士四十五年四月散館授編修十二月充文淵閣校理四十八年充順天鄉試同考官以四庫館第一分書成交部議敘五十一年充浙江鄉試正考官是年大清一統志成

恩敘儘先陞用五十三年四月擢右贊善五月

命提督湖北學政九月轉左春坊左贊善十二月擢右中允五十四年轉左中允旋擢侍講五十五年充日講起居注官五十六年大考一等擢詹事府詹事

命在南書房行走纂辦石渠寶笈時省蘭之兄省欽以工部侍郎督學順天因病奏請回京調理

上卽以省蘭代之五十七年二月劾奏督臣梁肯堂保薦教職竝未會商輒行具題

上嚴飭梁肯堂並通諭各省督撫於保薦甄別地方官員有似此並不會商輒以一人專主卽會銜具題者必重治其罪八月各省更換學差屆期省蘭奉

旨仍留順天學政十月擢內閣學士兼禮部侍郎具摺謝

恩

諭曰吳省蘭謝陞授內閣學士恩摺內有宣批諾之謨一語其意以內閣學士職司批本故用批諾二字但史冊所載如後漢之南陽宗資主畫諾係指太守不事事而言南齊江夏王蕭綽學畫鳳尾諾係屬藩王典故均與批本無涉卽朕批閱奏摺用硃筆批寫覽字亦不得謂之批諾是諾字雖係用古此處殊欠切當朕從不以語言文字責人因該學政尙稱讀書人摺內用字未妥降旨訓示伊亦不必稍存畏懼也十二月充文淵閣直

閣事六十年回京仍入直南書房九月

命稽查中書科嘉慶元年四月充殿試讀卷官九月充武會試副考官三年三月擢工部右侍郎

命閱大考翰詹卷旋充浙江鄉試正考官復奉

命任浙江學政四年正月調禮部右侍郎大學士和珅以罪伏誅

諭曰侍郎吳省蘭係和珅引用之人雖無人列款參劾但未便俸列卿貳著降爲編修撤爲學政不必在南書房行走五月擢右中允復充日講起居注官尋奉

命提督湖南學政七月擢侍講十二月奏庶民伏闕上書類多希冀

恩榮未必實有忠愛迨奉

諭旨輝耀還家稱雄鄉里把持公務在所不免其甚者聚衆釀金代倩作稿共推一人來京爲嘗試之計

皇上以誠求而宵人以詐應將來遇地方正事深恐挾制窒礙乞防其漸

上是之旋舉發江蘇同知李焜開列胞姪等名寄稟請託事

諭曰李焜在蘇州總捕同知任內審理生員馬照等一案妄拿拖累衆怨沸騰降補知縣是本以凌辱斯文獲罪今又欲使子姪濫廁士林以致敗露可見天理昭彰絲毫不爽著將李焜發往軍臺効力贖罪吳省蘭據實具奏甚屬公正著交部議敘六年奏苗疆永綏廳於乾隆二十五年設學今請照乾州鳳凰二廳一體選拔貢生一名又奏衡永寶辰沅郴靖等府州屬徭童向例另編字號各學每取三名查邵陽縣五屆無人應考而芷江縣徭童赴試者在二百人內外應將邵陽縣減額二名撥芷江縣定爲取進五名仍留一名於邵陽縣爲將來取進之額若有遷易再爲因時制宜均下部臣并撫臣議行八年擢侍講學士九年二月

聖駕幸翰林院與分韻賦詩

以下原書缺

路超吉陝西大荔人乾隆三十年由行伍拔補把總三十四年隨經略忠勇公傅恆征緬甸七月進征猛拱猛養等處陞千總十月攻老官屯賊匪身受鏢傷三十五年四月護經略印到京

引

見奉

旨賞授京職旋補巡捕南營守備三十九年二月遷中營遊擊五月調南營遊擊四十六年七月推陞廣西賓州營參將經步軍統領衙門奏留奉

旨以京營參將補用十月補南營參將四十九年調北營參將五十一年擢圓明園步軍統領中營副將五十三年授陝西河州鎮總兵

召見

賞戴花翎五十六年授雲南提督五十九年調廣東提督嘉慶元年正月奉

命進京預千叟宴二月回任十二月兩廣總督吉慶奏路超吉不能整頓水師營伍不勝提督之任請以總兵降補得

旨著以陸路總兵降補暫署潮州鎮總兵仍帶革職留任二年七月奏請隨同吉慶赴廣西軍營協勦苗匪以期報効

上允所請八月帶兵五百於八渡上游會勦賊匪殲斃千餘名